

老人權益中心

地址：荃灣沙咀道305號眾安大廈3字樓A1室 電話：(852) 2411 0196 傳真：2612 4222 電郵：greypower1997@yahoo.com.hk

三個特首得把口 老無所養生活愁 公眾諮詢幾時做 全民退保要綢繆

老人權益中心(下稱本中心)由一群貢獻香港社會一生的基層老人所組成，多年以來，本中心一直關注種種與長者權益有關的社會政策。面對香港社會人口老化和貧富兩極化日趨嚴重，現時每三名長者就有一人活在貧窮線之下，出現這個情況，歸根到底就是特區政府一直迴避設立全民退休保障計劃。作為老人權益中心主席，本人曾接觸過三任特首，覺得他們都是「講一套、做一套」，令人非常失望。

· 董建華：三老政策雷聲大 落雨收柴唔見晒

「董特首在 1997 年上場個陣提出老有所養、老有所屬、老有所為嘅『三老政策』，我以為佢真正關心我地班老人家，點知佢搞來搞去『得個桔』，實情就乜都唔得，最後連隻『生金蛋嘅雞』都賣比領匯，我好心話想『敲醒佢』，唔係話『敲死佢』，點知佢話腳痛下台，三老政策完全無晒聲氣。」

· 曾蔭權：全民退保 就話不設實際 做好份工 就係曾蔭權貴

「之後曾蔭權上台話要做好份工，佢做好份乜嘢工？今日都清楚晒啦，就係做好『官商勾結』份工。佢前年仲話要『起錨』，我以為佢起乜嘢錨，唔通真係轉性聽民意搞全民退休保障，點知佢仲話我地『不設實際』！佢公務員就預留五千億做長俸，我地無話眼紅佢，不過希望所有市民都有退休保障。」

· 梁振英：振英當選新特首 “認認真真”得把口

「梁振英我見過幾次，我話希望你要搞全民退休保障，一定要轟轟烈烈，唔好留番個爛子比下一代。佢仲話：『搞全民退休保障唔駛轟轟烈烈，認認真真就得啦』。之後唐英年同佢爭做特首都話要搞全民退休保障，我以為今次終於等到有人肯搞，點知講講吓變到將生果加到\$2200，但係又要審、又要查，咁即係『將隻雞換咗隻龜』，仲邊係全民退休保障呢？佢真係『請人食粥都要隔渣』！」

在新一屆政府即將上場之際，本中心要求立法會必須督促下任特首梁振英及其政府，在任內就設立全民退休保障制度進行公眾諮詢，並落實推行有關計劃，令全港長者可以得到「老有所養」。

搞好全民退休保障 不要留下爛攤子

我們這一代長者為香港打拼了幾十年，香港繁榮我有份，卻臨老醫食有憂。今天，全港超過 90 萬 65 歲以上的長者，竟然每三個人就有一個人經濟收入低於貧窮線，原因是我們退休前工資微薄、餐搵餐食，退休後拍手無塵、沒有完善的退休保障。正是「人又老、錢又無、身體又唔好、仔女幫唔到」，依靠生果金不夠養老，綜援制度只是「攔路狗」，令數以萬計長者寧願街頭拾荒，都不願又查又審，令致家嘈屋閉。隨著人口老化和貧富兩極化，長者貧窮這個深層次矛盾已經成為社會的「計時炸彈」，梁振英既然呼叫器「穩中求變」，就有責任在任內搞好全民退休保障，不要將爛攤子留給下一代！

全民性的退休保障 行公義 分風險 利全民

社會現時對如何落實全民退休保障有不同方案，我們支持「全民養老金」方案，第一、這個方案最穩陣，由政府、老闆和打工仔共同供款，唔怕綜援爆煲，唔怕經濟上落，制度穩陣，可持續推行；第二、這個方案最實際，將現有社會資源「炒埋一碟」，由政府成立啟動基金，經立法可即時推行；第三、金額水平合理，社會普遍接受金額水平足夠長者解決現時基本生活所需，日後可按通脹改善；第四、唔搞審查，像生果金一樣，長者攞得安心又開心，無須「退不能休」，也不會成為仔女的負累，有利一家共融，社會和諧。一句話、搞全民退休保障計劃，可達致「行公義、分風險、利全民」。

本中心重申以下立場：

- 1) 立法會必須督促新一屆特首及政府在任內就設立「全民退休保障計劃」提出方案，進行公眾諮詢；
- 2) 新一屆特區政府成立跨部門及高層次的機制，專責落實推行全民退休保障計劃。

老人權益中心主席 盧少蘭

2012年4月21日